

COLUMNA

In pessimist cuntent

ERWIN ARDÜSER

Avant onns hai jau fatg ina intervista cun el. Betg per rumantsch, per tu destg. L'entschatta dals onns 1960 è el arrivà a Flem, e quai plitost per casualidad, perquai ch'ina onda manava là in hotel. Ed era suenter passa 30 onns ch'el viveva en il Grischun discurriva el tudestg da scrittira cun slang englais. E per casualidad, era quai ha el raquintà durant il discurs, ha el insacuras intervegnì che sia mamma saveva sco ch'i para era rumantsch.

Naschì è el 1922 a Neuhäusen en il chantun da Schaffusa. Paucs onns pli tard èn ses bab, che lavorava sco mecanist d'aviun tar l'Armada svizra, e l'entira famiglia emigrads en l'America. Il crash da la bursa ha dentant destrüì il siemi d'ina meglia vita. El raquinta a mai dal temp da scola a New York, dal studi d'art, dals onns sco schuldà durant la Segunda Guerra mundiala, dal temp a Paris, Losanna e Kopenhagen. Cun sia dunna Sonya, oriunda dal Danemarc, turna el lura en Svizra, a Flem, e pauc pli tard bajegia el chasa a Laax.



Tranter auter lavura el per la «Tribune de Genève», per il «Tagesanzeiger» e per il «Nebelspalter». Ils onns 1950 cumpara en questa revista satirica per l'emprima giada sia figura la pli famusa: il «Herr Schüüch».

Il pli tard ussa suppon jau che l'in u l'auter sa cun tgi ch'jau hai fatg da lez temp ina intervista per il Radio Rumantsch. I n'è bain betg surfatg da pretendere che Hans Moser tutgava tar ils pli enconuschents caricaturists da la Svizra.

En ses texts, en sias caricaturas ed en ses disegns crititgava Hans Moser savens era il svilup dal temp modern e da la societad. Mai fascheva el quai den-

tant en furma agressiva, plitost en in stil quiet, ed adina cun fin umor. In bun exempel è era il svilup da ses lieu da dimora en Surselva ch'el ha adina persequità cun plima critica. El è arrivà a Laax ils onns che la vischnanca steva al cumenzament dal svilup turistic, dal boom da bajegiar da chasas ed abitaziuns da vacanzas. Enstagl da protestar ed auzar la vusch a la maisa radunda ubain durant la radunanza communal ha el fatg caricaturas en stil umoristic-critic.

Avant 10 onns, ils 4 d'october 2012, è Hans Moser mort en la vegliadetgna da 90 onns. Ed en bun in mais, ils 13 da favrer, pudess el pia festivar ses 100avel di da naschientscha.

Ala fin da nossa discurs hai jau vulì savair, sch'el saja cuntent cun sia vita. Sia resposta: «Gea, cun mai va quai bain. Jau sun in pessimist cuntent. Dentant in pessimist sun jau schon.»

Erwin Ardüser abitescha a Laax e lavura en l'administraziun da RTR.